

Komunikado di Prensa:

Hóbennan ku ta trein pa un mihó gobernashon na Bonaire

Awor ku tur e seis hóbennan, lantá na Kòrsou, a kuminsá nan periodo di entrenamentu definitivamente for di sèptèmber último na Entidat Públiko di Bonaire, Fundashon Mariadal, Tourist Corporation i Zorgverzekeringskantoor, Ban Boneiru Bèk ta klousurá e proyekto ku sentimentunan miksto. E echo ku ehkushon di e proyekto 'Traineeship', pa kua e fundashon a hasi hopi esfuerso desde 2009, ta diferensia for di e idea i meta original, e echo ku Ministerio di Asuntunan Interior a kita e proyekto pa despues yam'é nan iniciativa, no ta al kaso awor, segun miembronan di direktiva Hans Evers i Celia Fernandes Pedra. "Huntu ku mas hende nos a traha hopi duru i durante seis aña largu pa logra e proyekto aki. Nos a papia ku bastante hende i no a pèrdè kurashi, tampoko ora Hulanda no tabata mostra ningun klase di interes. Nos tabata kere fielmente den importansha di e proyekto. Ta p'esei nos ta sostené e proyekto aki den su forma aktual tambe, aunke nos ta lamentá ku asina tantu tempu a bai pèrdí. Nos hóbennan bon studiá por a duna un aporte importante na bon gobernashon na Boneiru for di aña 2010 kaba. Laga esaki ta un lès pa nos i laga nos apresia inisiativanan di hendenan ku konosé i stima Boneiru mas. Echo ku awor Hulanda ta dispuesto pa ehekutá e proyekto aki, ta muestra ku e idea ta sólido i masha importante pa desaroyo di Boneiru. "Nos trabou ta kla", Celia Fernandes Pedra, presidente di Fundashon Ban Boneiru Bèk, ta konkluí.